



Broj: 01-50-1-15-11/23

Sarajevo, 21. 9. 2023.

SARAJEVO			
PRIMLJENO: 13-10-2023			
Organizaciona jedinica	Klasifikaciona oznaka	Redni broj	Broj priloga

ZAPISNIK

11. sjednice Predstavničkog doma Parlamentarne skupštine Bosne i Hercegovine, održane 21. 9. 2023.

Sjednica je počela u 12.10 sati. Prisustvovalo je 40 poslanika.

Odsustvovali su Darijana Filipović i Mladen Bosić.

Sjednici su prisustvovali ministar pravde BiH Davor Bunoza i zamjenik ministra vanjskih poslova BiH Josip Brkić.

Sjednicu su pratili predstavnici Ministarstva civilnih poslova BiH, Ministarstva komunikacija i prometa BiH, Granične policije BiH i Državne regulatorne agencije za radijacijsku i nuklearnu sigurnost. Iz međunarodnih organizacija sjednicu su pratili predstavnici OSCE-a i Vijeća Evrope.

Predsjedavajući je rekao da će, u skladu s članom 167. Poslovnika, na početku sjednice, prije rasprave o dnevnom redu, poslanicima biti omogućeno postavljanje poslaničkih pitanja u usmenoj formi.

U skladu s članom 168. Poslovnika, najave za postavljanje poslaničkih pitanja u usmenoj formi dostavili su sljedeći poslanici:

- **Jasmin Emrić** – predsjedavajućoj Vijeća ministara BiH,
- **Darko Babalj** – predsjedavajućoj Vijeća ministara BiH,
- **Saša Magazinović** – predsjedavajućoj Vijeća ministara BiH,
- **Safet Kešo** – ministru vanjskih poslova BiH i ministru odbrane BiH,
- **Nenad Grković** – ministru sigurnosti BiH.

Najave su, u skladu s članom 168. stav (2) Poslovnika, dostavljene predsjedavajućoj Vijeća ministara BiH i onom članu Vijeća ministara BiH na koga se pitanje odnosi. Predsjedavajući je podsjetio na to da je osiguran i direktan TV prijenos ovog dijela sjednice u skladu s članom 167. stav (1) Poslovnika.

Predsjedavajući je napomenuo da je iz Kabineta predsjedavajuće Vijeća ministara BiH dostavljeno obavještenje da će odgovori na usmena pitanja biti dostavljeni naknadno.

Sadržaj postavljenih pitanja je sljedeći: ¹

Jasmin Emrić

„U periodu od 12. do 13. ovog mjeseca grupa poslanica i poslanika, kao i predstavnika službi Parlamentarne skupštine BiH učestvovala je u Skoplju, Sjeverna Makedonija, na konferenciji pod nazivom – Jačanje Berlinskog procesa kroz parlamentarnu demokratiju. U skladu s nazivom konferencije, fokus i tema je bila kako Berlinski proces kao platformu međuvladine saradnje na visokom nivou približiti parlamentima zemalja Zapadnog Balkana, te uključiti parlamentarce radi informiranja ratifikacije i realizacije potpisanih sporazuma. S obzirom na to da je bivši predsjedavajući Vijeća ministara BiH gosp. Zoran Tegeltija 3. novembra prošle godine parafirao tri sporazuma na Samitu šefova i država i vlada Berlinskog procesa, postavljam pitanje predsjedavajućoj Vijeća ministara BiH, koje glasi: Koji su razlozi zbog kojih Bosna i Hercegovina još uvijek nije ratificirala sporazume iz Berlinskog procesa, i to: Sporazum koji omogućava slobodno kretanje s ličnim kartama između zemalja Zapadnog Balkana, Sporazum o priznavanju visokoškolskih diploma i kvalifikacija i Sporazum o priznavanju profesionalnih kvalifikacija za doktore medicine, doktore stomatologije i arhitekte, te da li imate u planu, odnosno da li Vijeće ministara ima u planu da se predmetni sporazumi ratificiraju do održavanja samita na visokom nivou koji se treba održati u Tirani 16. oktobra ove godine?“

S obzirom na to da sjednici nije prisustvovala predsjedavajuća Vijeća ministara BiH Borjana Krišto, odgovor na pitanje bit će dostavljen u pisanoj formi.

Darko Babalj

S obzirom na to da sjednici nije prisustvovala predsjedavajuća Vijeća ministara BiH Borjana Krišto, Darko Babalj je rekao da će dostaviti pitanje u pisanoj formi.

Saša Magazinović

„Moje pitanje je trebalo biti upućeno predsjedavajućoj Vijeća ministara BiH, koja nije tu, a trebalo se odnositi na sve češću pojavu kršenja Zakona o radu u institucijama BiH od strane državnih službenika čije je političko djelovanje, slijeđenje političkih stavova i njihovo javno izricanje je zakonom zabranjeno i propisane su kazne. Dakle, imali smo nedavno slučaj kada sam i sam reagovao kada je ministar Košarac imao potrebu i mislim da je time najveću štetu nanio tim državnim službenicima da ih okupi i politički djeluje, nije sad više bitna tema, ali da budem fer i korektan, nije ovo samo u slučaju ministra Košarca, to se vrlo često dešava. Dakle, vrlo je jasna situacija i vrlo je jasan Zakon, državni službenici su državni službenici i njima je zabranjeno bavljenje politikom, učešće na političkim skupovima, reklamiranje političkih

¹ Sadržaj pitanja preuzet je iz neautoriziranog transkripta 11. sjednice Predstavničkog doma.

stranaka, iznošenje političkih stavova, zabranjeno im je da slijeda naredbe političara i političkih stranaka. Oni koji su izabrani i imenovani naravno da mogu politički djelovati, ali Zakon tačno kaže ko je u ovoj zemlji političar, a ko nije. Državni službenici ako hoće da se bave politikom, to je isto tako vrlo jednostavno izvodivo, daju otkaz i postanu političari, sve dok se to ne desi, oni to nisu. Mene je interesovalo, a ja ću zadržati pravo i neću pitati, ne tražim ovaj pisani odgovor od predsjedavajuće, pitaću je ovo ponovo. Dakle, mene zanima da li je Vijeće ministara svjesno toga u šta se pretvorila državna služba i ima li namjeru išta preduzeti ili treba ići prijavu po prijavu, čovjeka po čovjeka, da se ljudi kaznama opamete i da znaju gdje im je mjesto u ovom čitavom sistemu?

Sjednici nije prisustvovala predsjedavajuća Vijeća ministara BiH Borjana Krišto, a Saša Magazinović nije tražio odgovor u pisanoj formi.

Safet Kešo

„Ja sam danas imao namjeru postaviti usmena pitanja ministrima Konakoviću i Helezu, oni danas nisu prisutni ovdje tako da ću zatražiti da mi se u pisanom obliku odgovori na ono što je bila moja namjera. Pravo da vam kažem razmišljao sam da li da, ovaj, možda je i bolje da narod ne čuje ovu sramotu koju bi inače čuo kad je u pitanju evo ovo o čemu sam ja htio da razgovaram ili da ih pitam, jer su moja pitanja se odnosila na tvrdnju ministra odbrane gospodina Zukana Heleza da je novac za nabavku američkih helikoptera bio prebačen Ministarstvu odbrane, ali da je povučen nakon što je ministar Konaković zajedno sa ministrima iz SNSD-a izvršio pritisak na zamjenika ministra finansija upozoravajući ga na krivičnu odgovornost koje, prema tvrdnjama ministra Heleza izrečenim u medijima, nije bilo. To je tolika sramota dakle da je i bolje da narod ne čuje odgovor na tu sramotu, ali u svakom slučaju insistiram na odgovoru u pisanom obliku. Također da dodatno pitam: da li su u pitanju helikopteri o kojima je razgovarano na onoj tzv. historijskoj sjednici i o kojima se zvonilo na sva zvona ili su u pitanju neborbeni helikopteri, jer koliko čujemo da je u odluci to izmijenjeno i kakve oni imaju svrhe, dakle, za Oružane snage BiH? Očigledno su to preinačili, nabavljaju se neborbeni helikopteri i tražim, dakle, pisani odgovor u ovoj formi što je moguće detaljniji i očigledno je da onaj princip da niko nikom ne smeta je preinačen u radu ovog Vijeća ministara i da on glasi da niko Dodiku ne smeta, a da unutar Trojke, koja djeluje očigledno kao raštamani orkestar, smetaju uzajamno jedni drugima. Dakle, šta je istina, meni odgovara samo ono što je istina, neka odgovor bude tačan.“

S obzirom na to da sjednici nisu prisustvovali ministar vanjskih poslova BiH Elmedin Konaković i ministar odbrane BiH Zukan Helez, Safet Kešo je zatražio da se odgovor na pitanje dostavi u pisanoj formi.

Nenad Grković

„Ja se nadam da ima nekoga ovdje iz Ministarstva sigurnosti da da odgovor, a ako već nema, ja bih samo pročitao to pitanje, pa neću tražiti ovaj odgovor u pisanoj formi. Dakle, moje pitanje glasi, dakle, nakon što Savjet ministara BiH nije ispunio preporuke za sprečavanje pranja novca

i finansiranja terorizma Bosna i Hercegovina ima velike šanse da se ponovo nađe na svojoj listi Moneyvala, što će imati finansijske, političke i ekonomske posljedice za građane. Stoga je opravdana nervoza bankara Bosne i Hercegovine pred novu posjetu Moneyvala, organizacije Vijeća Evrope za praćenje pranja novca, koji očekujemo početkom jeseni. Osam godina nakon što je Bosna i Hercegovina skinuta sa sive liste vraćanje na nju postaje sve izvjesnije, jer vlasti nisu usvojile potrebne zakone, niti provele reforme za sprečavanje pranja novca i finansiranje terorizma. Vraćanje na listu će otežati novčane transakcije za firme, ali i za građane, to će značiti devastaciju ekonomskih tokova u BiH, stoga postavljam pitanje gospodinu ministru sigurnosti BiH Nenadu Nešiću – Kada će biti završena izrada novog zakona o sprečavanju pranja novca i finansiranja terorističkih organizacija?

Predsjedavajući je, povodom utvrđivanja dnevnog reda, rekao sljedeće:

Dodata je:

- **Tačka 12.** - Davanje saglasnosti za ratifikaciju Sporazuma o ekonomskoj saradnji između Bosne i Hercegovine i Republike Sjeverne Makedonije, broj: 01,02-21-1-1952/23 od 8. 9. 2023.

Nije bilo rasprave o dnevnom redu.

Predsjedavajući je konstatirao da 11. sjednica Predstavničkog doma ima sljedeći

DNEVNI RED

1. Usvajanje zapisnika 10, 5. hitne i 6. hitne sjednice Predstavničkog doma Parlamentarne skupštine BiH;
2. Komentari na dobivene odgovore na poslanička pitanja;
3. Prijedlog zakona o vanjskim poslovima Bosne i Hercegovine, predlažać: Vijeće ministara BiH, broj: 01,02-02-1-1786/23 od 11. 8. i 17. 8. 2023. (prvo čitanje);
4. Prijedlog zakona o sklapanju i izvršavanju međunarodnih ugovora, predlažać: Vijeće ministara BiH, broj: 01,02-02-1-1793/23 od 15. 8. i 8. 9. 2023. (prvo čitanje);
5. Izvještaj o stanju radijacijske i nuklearne sigurnosti za 2022. godinu, podnosilac: Državna regulatorna agencija za radijacijsku i nuklearnu sigurnost, broj: 01,02-50-18-1784/23 od 11. 8. 2023;
6. Razmatranje interpelacije poslanika: Šerifa Špage, Edina Ramića, Midhata Čauševića, Šemsudina Dedića, Safeta Keše, Nermina Mandre, Amora Mašovića, Šemsudina Mehmedovića, Denijala Tulumovića, Milana Dunovića, Vlatka Glavaša, Zlatana Begića, Jasmina Emrića i Elvise Hodžić, broj: 01-50-1-1840/23 od 23. 8. 2023;
7. Izvještaj komisije Kolegija o nastojanju za postizanje saglasnosti o poslaničkoj inicijativi Šemsudina Mehmedovića, broj: 01-50-1-1365/23 od 23. 8. 2023;

8. Izvještaj komisije Kolegija o nastojanju za postizanje saglasnosti o poslaničkoj inicijativi Šemsudina Mehmedovića, broj: 01-50-1-1431/23 od 23. 8. 2023;
9. Izvještaj komisije Kolegija o nastojanju za postizanje saglasnosti o poslaničkoj inicijativi Darka Babalja, broj: 01-50-1-1576/23 od 23. 8. 2023;
10. Poslanička inicijativa Aide Baručije, Sabine Čudić i Predraga Kojovića, broj: 01-50-1-1910/23 od 1. 9. 2023;
11. Prijedlog odluke o osnivanju ad hoc komisije Parlamentarne skupštine Bosne i Hercegovine za provođenje postupka imenovanja Vijeća Regulatorne agencije za komunikacije Bosne i Hercegovine, predlaž: Ministarstvo komunikacija i prometa BiH, broj: 01,02-34-1-312-1/23 od 4. 9. 2023;
12. Davanje saglasnosti za ratifikaciju Sporazuma o ekonomskoj saradnji između Bosne i Hercegovine i Republike Sjeverne Makedonije, broj: 01,02-21-1-1952/23 od 8. 9. 2023.

Ad. 1. Usvajanje zapisnikâ 10. 5. hitne i 6. hitne sjednice Predstavničkog doma Parlamentarne skupštine BiH

Predsjedavajući je dao uvodne napomene. Nije bilo rasprave.

Zapisnik 10. sjednice Predstavničkog doma usvojen je s 34 glasa „za“ (iz Federacije BiH 23, iz Republike Srpske 11), dva „protiv“ i dva glasa „suzdržan“.

Zapisnik 5. hitne sjednice Predstavničkog doma usvojen je s 35 glasova „za“ (iz Federacije BiH 23, iz Republike Srpske 12), jednim „protiv“ i dva glasa „suzdržan“.

Zapisnik 6. hitne sjednice Predstavničkog doma usvojen je s 35 glasova „za“ (iz Federacije BiH 23, iz Republike Srpske 12), dva „protiv“ i jednim glasom „suzdržan“.

Ad. 2. Komentari na dobivene odgovore na poslanička pitanja

Predsjedavajući je rekao da su, u skladu s članom 170. Poslovnika, do ove sjednice Doma pitanja i inicijative u pisanoj formi postavili su poslanici:

- Šemsudin Mehmedović – postavio osam pitanja i zatražio upućivanje urgencija za dostavljanje odgovora,
- Albin Muslić – postavio dva pitanja,
- Jasmin Emrić – postavio jedno pitanje,
- Aida Baručija – postavila 80 pitanja,
- Rejhana Dervišević – postavila 32 pitanja,
- Ermina Salkičević-Dizdarević – postavila pet pitanja,
- inicijativu Kolegiju Doma uputili su poslanici Aida Baručija, Sabina Čudić i Predrag Kojović.

Do današnje sjednice dostavljeni su sljedeći odgovori:

- na pitanja Šemsudina Mehmedovića dostavljena su tri odgovora,
- na pitanja Saše Magazinovića dostavljeno je 14 odgovora,
- na pitanja Aide Baručije dostavljeno je 15 odgovora,
- na pitanja Ermine Salkičević-Dizdarević dostavljena su dva odgovora,
- na pitanja Darka Babalja dostavljena su dva odgovora,
- na pitanja Midhata Čauševića dostavljena su dva odgovora,
- na pitanje Sanje Vulić dostavljen je jedan odgovor, kao i jedan odgovor na inicijativu,
- na pitanja Jasmina Emrića dostavljena su dva odgovora,
- po jedan odgovor dostavljen je na pitanja: Rejhane Dervišević, Mire Pekić, Albina Muslića, Miroslava Vujičića i Milana Petkovića.

Dobivene odgovore komentirali su: Saša Magazinović, Albin Muslić, Šemsudin Mehmedović, Midhat Čaušević, Ermina Salkičević-Dizdarević i Sanja Vulić.

Ad. 3. Prijedlog zakona o vanjskim poslovima Bosne i Hercegovine, predlagatelj: Vijeće ministara BiH, broj: 01,02-02-1-1786/23 od 11. 8. i 17. 8. 2023. (prvo čitanje)

Predsjedavajući je dao uvodne napomene.

Prijedlog zakona obrazložio je zamjenik ministra vanjskih poslova BiH Josip Brkić.

U raspravi su učestvovali: Nihad Omerović, Nebojša Radmanović, Šerif Špago, Safet Kešo, Mira Pekić, Darko Babalj, Milorad Kojić, Milan Dunović, Predrag Kožul, Mia Karamehić-Abazović i Denis Zvizdić.

Po završetku rasprave ponovo je, povodom navoda iz rasprave, diskutirao zamjenik ministra vanjskih poslova BiH Josip Brkić.

„Za“ Prijedlog zakona o vanjskim poslovima Bosne i Hercegovine u prvom čitanju glasala su 23 poslanika (iz Federacije BiH 22, iz Republike Srpske jedan), „protiv“ 12, „suzdržana“ tri poslanika. Predsjedavajući je konstatirao da nema potrebne entitetske većine u prvom krugu glasanja i da će Kolegij Doma kao komisija obaviti naknadno usaglašavanje o navedenom prijedlogu zakona u prvom čitanju.

Ad. 4. Prijedlog zakona o zaključivanju i izvršenju međunarodnih ugovora, predlagač: Vijeće ministara BiH, broj: 01,02-02-1-1793/23 od 15. 8. i 8. 9. 2023. (prvo čitanje)

Nakon uvodnih napomena predsjedavajućeg, Prijedlog zakona obrazložio je zamjenik ministra vanjskih poslova BiH Josip Brkić.

U raspravi su učestvovali Milorad Kojić i Darko Babalj.

„Za“ Prijedlog zakona o zaključivanju i izvršenju međunarodnih ugovora u prvom čitanju glasala su 23 poslanika (iz Federacije BiH 22, iz Republike Srpske jedan), „protiv“ 12, „suzdržana“ tri poslanika. Predsjedavajući je konstatirao da nema potrebne entitetske većine u prvom krugu glasanja i da će Kolegij Doma kao komisija obaviti naknadno usaglašavanje o navedenom prijedlogu zakona u prvom čitanju.

Ad. 5. Izvještaj o stanju radijacijske i nuklearne sigurnosti za 2022. godinu, podnosilac: Državna regulatorna agencija za radijacijsku i nuklearnu sigurnost, broj: 01,02-50-18-1784/23 od 11. 8. 2023.

Nakon uvodnih napomena predsjedavajućeg nije bilo rasprave.

Izvještaj o stanju radijacijske i nuklearne sigurnosti za 2022. godinu usvojeno je u drugom čitanju s 30 glasova „za“ (iz Federacije BiH 22, iz Republike Srpske osam), bez glasova „protiv“ i osam glasova „suzdržan“.

Ad. 6. Razmatranje interpelacije poslanika: Šerifa Špage, Edina Ramića, Midhata Čauševića, Šemsudina Dedića, Safeta Keše, Nermina Mandre, Amora Mašovića, Šemsudina Mehmedovića, Denijala Tulumovića, Milana Dunovića, Vlatka Glavaša, Zlatana Begića, Jasmina Emrića i Elvise Hodžić, broj: 01-50-1-1840/23 od 23. 8. 2023.

Nakon uvodnih napomena predsjedavajućeg interpelaciju je obrazložio Jasmin Emrić kao predstavnik predlagača.

U raspravi su učestvovali: Sanja Vulić, Safet Kešo i Jasmin Emrić.

Jasmin Emrić predložio je sljedeće zaključke:

1. „Predstavnički dom Parlamentarne skupštine BiH traži od Tužilaštva BiH da provede istragu o provođenju Zakona o zrakoplovstvu Bosne i Hercegovine ("Službeni glasnik BiH", broj 39/09) i ostalih propisa zasnovanih na tom zakonu, kao i Pravilnika o odobravanju letova ("Službeni glasnik BiH", broj 53/18) u predmetu letenja helikoptera Super Puma Ministarstva unutrašnjih poslova Republike Srbije, koji je 24. 7. 2023. ušao

u zračni prostor Bosne i Hercegovine, zatim 25. 7. 2023. izvršio više letova u zračnom prostoru Bosne i Hercegovine, te da u slučaju postojanja obilježja krivičnog djela protiv odgovornih i službenih lica pokrene krivični postupak.

2. Predstavnički dom Parlamentarne skupštine BiH zadužuje Ministarstvo vanjskih poslova BiH da uputi diplomatsku notu Republici Srbiji kojom se ukazuje na prekršene diplomatske procedure i narušavanje suvereniteta i teritorijalnog integriteta zračnog prostora Bosne i Hercegovine od strane njihovog državnog zrakoplova, helikoptera Super Puma Ministarstva unutrašnjih poslova Republike Srbije, a koji je 24. 7. 2023. protuzakonito ušao u zračni prostor Bosne i Hercegovine, te 25. 7. 2023. nelegalno izvršio više letova i operacija u zračnom prostoru Bosne i Hercegovine. Također, ovom diplomatskom notom, radi razjašnjenja cijelog slučaja, kako se ova praksa ne bi više ponavljala, treba predložiti provođenje zajedničke i međunarodne istrage.“

„Za“ navedeni prijedlog zaključaka glasalo je 19 poslanika (iz Federacije BiH), „protiv“ sedam, „suzdržan“ jedan poslanik. Predsjedavajući je konstatirao da nema potrebne entitetske većine u prvom krugu glasanja i da će Kolegij Doma kao komisija obaviti naknadno usaglašavanje o navedenom prijedlogu zaključaka poslanika Jasmina Emrića.

Ad. 7. Izvještaj komisije Kolegija o nastojanju za postizanje saglasnosti o poslaničkoj inicijativi Šemsudina Mehmedovića, broj: 01-50-1-1365/23 od 23. 8. 2023.

Nakon uvodnih napomena predsjedavajućeg nije bilo rasprave, jer je okončana na prethodnoj sjednici.

Dom je, u drugom krugu glasanja, s 24 glasa „za“, 11 „protiv“ (iz Federacije BiH tri, iz Republike Srpske osam) i tri glasa „suzdržan“, usvojio poslaničku inicijativu Šemsudina Mehmedovića.

Ad. 8. Izvještaj komisije Kolegija o nastojanju za postizanje saglasnosti o poslaničkoj inicijativi Šemsudina Mehmedovića, broj: 01-50-1-1431/23 od 23. 8. 2023.

Nakon uvodnih napomena predsjedavajućeg nije bilo rasprave, jer je okončana na prethodnoj sjednici.

Dom, u drugom krugu glasanja nije usvojio poslaničku inicijativu Šemsudina Mehmedovića - „za“ je glasao 21 poslanik, „protiv“ 15 (iz Federacije BiH tri, iz Republike Srpske 12), „suzdržana“ dva poslanika.

Ad. 9. Izvještaj komisije Kolegija o nastojanju za postizanje saglasnosti o poslaničkoj inicijativi Darka Babalja, broj: 01-50-1-1576/23 od 23. 8. 2023.

Nakon uvodnih napomena predsjedavajućeg nije bilo rasprave, jer je okončana na prethodnoj sjednici.

Dom je, u drugom krugu glasanja, s 21 glasom „za“, osam „protiv“ (iz Federacije BiH jedan, iz Republike Srpske sedam) i devet glasova „suzdržan“, usvojio poslaničku inicijativu Darka Babalja.

Ad. 10. Poslanička inicijativa Aide Baručije, Sabine Ćudić i Predraga Kojovića, broj: 01-50-1-1910/23 od 1. 9. 2023.

Nakon uvodnih napomena predsjedavajućeg, u raspravi su učestvovali: Aida Baručija, Šerif Špago, Saša Magazinović i Milorad Kojić.

„Za“ poslaničku inicijativu Aide Baručije, Sabine Ćudić i Predraga Kojovića glasalo je 19 poslanika (iz Federacije BiH 18, iz Republike Srpske jedan), „protiv“ 13, „suzdržanih“ šest. Predsjedavajući je konstatirao da nema potrebne entitetske većine u prvom krugu glasanja i da će Kolegij Doma kao komisija obaviti naknadno usaglašavanje o navedenoj poslaničkoj inicijativi.

Ad. 11. Prijedlog odluke o osnivanju Ad hoc komisije Parlamentarne skupštine Bosne i Hercegovine za provođenje postupka imenovanja Vijeća Regulatorne agencije za komunikacije Bosne i Hercegovine, predlagач: Ministarstvo komunikacija i prometa BiH, broj: 01,02-34-1-312-1/23 od 4. 9. 2023.

Nakon uvodnih napomena predsjedavajućeg diskutirali su Darko Babalj i Sanja Vulić.

Prijedlog odluke o osnivanju Ad hoc komisije Parlamentarne skupštine Bosne i Hercegovine za provođenje postupka imenovanja Vijeća Regulatorne agencije za komunikacije Bosne i Hercegovine usvojen je s 21 glasom „za“ (iz Federacije BiH 13, iz Republike Srpske osam), 17 „protiv“ i bez glasova „suzdržan“.

Ad. 12. Davanje saglasnosti za ratifikaciju Sporazuma o ekonomskoj saradnji između Bosne i Hercegovine i Republike Sjeverne Makedonije, broj: 01,02-21-1-1952/23 od 8. 9. 2023.

Nakon uvodnih napomena predsjedavajućeg nije bilo rasprave.

Saglasnost za ratifikaciju Sporazuma o ekonomskoj saradnji između Bosne i Hercegovine i Republike Sjeverne Makedonije data je jednoglasno, s 38 glasova „za“ (iz Federacije BiH 25, iz Republike Srpske 13).

Sjednica je završena u 16.36 sati.

Sastavni dio Zapisnika je transkript 11. sjednice Predstavničkog doma.

SEKRETAR
PREDSTAVNIČKOG DOMA

Marin Vukoja

PREDSJEDAVAJUĆI
PREDSTAVNIČKOG DOMA

Marinko Čavara